

Carta Tsa Jacuhun Ra Santiago Tsi Nyiví Israel Tsa Yihí Cuenda Ra Cristo

Nu tsahá ra Santiago nacumi tsi nyiví

¹ Yuhu ra Santiago cuví yu iin ra jahá tyiñu tyiñu Nyoo tan Jutu Mañi yo Jesucristo. Jaquitsí yu nacumi tsi tandihí nyoooho tsa cuví ndo tata tsa utsi uví ra sehe ra Israel tan iyó ndo ñuu nyiví tsa ñavin tata ra Israel cuví.

Tsa tsíñi tuñi tsa tsahá Nyoo tsiyo

² Yañi, cüsii iñi ndo tun cuaha tundoho nyehé ndo. ³ Tyin tsító ndo tyin tsihin tsa nyehé ndo tundoho tan cua cuahnu ca ndo tsihin tsa tsinú iñi ndo. Tan cua cunyee iñi ndo nyehe ndo náa ndihí ca tundoho vatsí siqui ndo. ⁴ Jañá ndo na quitsi maa tundoho can siqui ndo, tyin tun tsa cunyee iñi ndo yahá ndo tundoho can, cua cuvi ndo nyiví tsitsa tsihin tuhun Nyoo, tan nduve ca náa cua cumañi tsi ndo tan cua cunyee ndo yaha ndo tandihí maa tundoho tsa cua quitsi siqui ndo.

⁵ Ndáa nyoooho cumañi tsa tsíñi tuñi tsi, ndäcan ndo itsi tsi Nyoo, tan Nyoo cua cuhva ra itsi tsi ndo, tyin maa ra tsahá ra tsa tsicán tandihí nyiví tan ña tuhvá ra tyicuhvá itsi, tan ndi ña cuxaán ra tsi ñi tun tsicán ñi náa tsicán ñi tsi ra. ⁶ Maa tyin cuñí tsi ndäcan yo itsi tsihin tsa tsinú vaha iñi yo. Tan ña caca iñi yo tyin ña cua cuhva ra itsi tsi yo. Tyin tun caca iñi yo tyin ña cua ñihi yo tsa tsicán yo,

cuví yo tumaa ndutya ñuhu tsa tandahá tatyi ityi ihya tan ityi can. ⁷ Ra tsa javahá tacan, ña taahán tsi caca iñi ra tyin cua cuhva Nyoo tsa tsicán ra. ⁸ Tyin ubi xaan tsicá iñi ra. Ña tyaá iñi ra tsa tsicán ra, tyin ña iin cuñí ra. Vityin cuñí ra tsa cuñí ra, tan inga tsa cuñí tucu ra tyaan. ⁹ Tatun iyó iin ra yañi yo, ndaahvi ra, na cusii iñi ra tyin cahnu cuví ra jahá Nyoo. ¹⁰ Tatun iin ra yañi yo, tan cuca ra, tun cua ndundaahvi ra nu ñuhu ñayiví ihya, taahán tsi cusii iñi ra tsihin Nyoo tyin tsító ra tyin cuví ra tumaa cuví ita tsa iyó tsitsi cuhu, tyin ita can iin yaha ñi cucoyó can. ¹¹ Tyin ihñi xaan cuví tsitsi cuhu jahá ñicanyii. Tacan tan na ityí ita can. Tan canacavá can tan ndihí tsa sii caá can. Tan tacan cuví ra cuca, tyin cua quitsi tuhun tsiihí tsi ra tan cua cundihi tsa cuca ra.

Nacaa cunyeé iñi yo nyehé yo tundoho

¹² Sii xaan cuví tsi ra tsa cua cunyee iñi nyehe tundoho tyin tsa yaha nyehe ra tundoho cua ñihi ra ñayiví nyito tsa catyi Nyoo tyin cuhva ra tsi ñi tsa cuñí tsi ra. ¹³ Tatun ndáa nyooho tsicá iñi ndo tsa javaha ndo tsa ña vaha, ña cuñí ndo tyin Nyoo tsahá tsa caca iñi ndo tacan. Tyin Nyoo ña tsicá iñi ra javaha ra tsa ña vaha. Tan ndi ña tyuhú ra tsi yo tsa javaha yo tsa ña vaha. ¹⁴ Maa tyin nyooho tsa javahá tsa ña vaha, javahá ndo can tyin cuñí ndo javaha ndo can. Tan yacan cuenda tsicoó cuatyí ndo. ¹⁵ Tatun cua cuhva yo tsa caca iñi yo tuhun ña vaha, coo quiví cua javaha yo cuhva tsicá iñi yo tan cua coo cuatyí yo. Tan tatu maa ñi yacan cua javaha yo, cua tatsi tuñi Nyoo tsi yo tsa cuenda can tan cua cíu yo.

16 Yañi, cuñí xaan yu tsi ndo. Ña jandavi ñaha ndo tsi ndo. **17** Tandihi tsa vaha tan tsa vii tsa ñihí yo, queé tsi ityi siqui tyin maa Nyoo Jutu yo tsahá itsi. Tan maa ra javahä ñuhü tsa iyó andiví: tiñuu, tan yoo, tan ñicanyii. Tan maa ra tacan ñi cuví ra Nyoo, tyin ndi luxu ña tuhvá ra nasama. **18** Tan tsahá ra ñayiví tsaa tsa iyó yo tsa cuenda tsa nditsa tsa caahán ra. Tyin jihna ca yo jandutsaá ra tsa nuu tandihí ca tsa javahä ra, tyin tacan cuñí maa ra.

Ityi nditsa tsa taahán tsi cuhun yo

19 Yacan cuenda yañi, intuhun intuhun yo tan taahán tsi cuhun iñi yo tsa tyá soho yo, maa tyin ña yatyí xaan nacahan yo tan ndi ña yatyí xaan cuxaan yo. **20** Tyin nyiví tsa cuxaán, ña javahá ñi tsa taahán iñi Nyoo. **21** Yacan cuenda jaña ndo tsa ña vaha tan tsa caquiñi tsa iyó cuaha nu ñuhu ñayiví ihya. Ndaahvi jaña ndo tsi ndo tan tÿin cuenda vaha ndo tuhun Nyoo tsa tatsi ra añima ndo. Tyin tuhun Nyoo can iyó tunyee iñi itsi tsa jacacú tsi tsi yo. **22** Javaha ndocuhva caahán tuhun Nyoo, tan ña tyaa soho ñi maa ndo itsi, tyin tatum tyaa soho ñi maa ndo itsi juvin ñi tsi maa ndo jandaví ñaha ndo. **23** Tyin nyiví tsa tyá soho tuhun Nyoo tan ña javahá ñi cuhva caahán tsi, cuví ñi tumaa nyiví nyehé nuu ñi nu inu. **24** Tyin nyehé ñi cuhva caá ñi, yaha can tan cuahán ñi tan naá nyico iñi ñi cuhva caá ñi. **25** Maa tyin nyiví tsa iin nyita ñi tyá soho tuhun Nyoo tsa tavá nuña tsi yo ndaha nu ña vaha tan ña naá iñi ñi itsi tan javahá ñi cuhva caahán tsi, sií cua cuvi tsi ñi ican tan cua quita vaha tandihí tsa javahá ñi. **26** Tan

nyíví tsa catyí tyin tuhun Nyoo yíhí ñi, maa tyin yatyí xaan yuhu ñi cahan ñi tsa caquiñi, nduve nacatyí tsicá ñi tuhun Nyoo tyin juvin ñi tsi maa ñi jandaví ñaha ñi. ²⁷ Tyin tsa cuenda Nyoo, nyíví tsa nditsa tsinú iñi tsi ra juvin ñi cuví ñi tsa javahá tyehen: Jatyinyéé ñi tsi nyíví ndaahvi tsa tsihí yíi, tan jahá cuenda ñi tsi tsa nyihi tsa nduve ca sihi tan jutu, tan jahá cuenda ndihí tucu ñi tsi maa ñi tsa ña javaha ñi tsa ña vaha.

2

Na inducu ñi cuñi yo tsi nyíví tyin ña siiñ caá intuhun ñi tan inga ñi

¹ Yañi, nyooho tsinú iñi ndo tsi Jutu Mañi yo Jesucristo, ra tsa cahnu xaan cuví, yacan cuenda ña taahán tsi cahnu jaha ndo tsi iin nyíví tan ñavin ca inga ñi. ²⁻³ Tatun cua quíhví iin ra yíhí iin xehe xuhun cuaan ndaha tsitsi vehe ñuhu nu yucú ndo, tan nditsí ra jahma xiñu, ¿nácaa cua cahan ndo tsihin ra? ¿A ña cua catyi ndo, “Cunyaña nu tyayu vaha ihya”? Tan juvin ñi cuhva can tan quíhví tucu iin ra ndaahvi nditsí ra jahma tyaahnyá, tan catyi ndo tsihin ra, “cunyaña nyityi juvin o cunyaña nu ñuhu ihya”. ⁴ Ña vaha tsa javahá ndo tacan, tyin ña inducu jahá ndo tsa ñayíví tsi ra na, tan tsicá iñi ndo tsa ña vaha.

⁵ Yañi tsa cuñí xaan yu, tyaa soho ndo tuhun ihya: Nyoo nacatsí ra tsi nyíví ndaahvi nu ñuhu ñayíví ihya, tyin nducuca ñi tsihin tsa tsinú iñi ñi tsi ra, tan cua ñihi ñi tsa vaha nu ndacá ñaha ra tyin yacan cuví tsa catyí ra tyin cuhva ra tsi nyíví tsa cuñí tsi ra. ⁶ Maa tyin nyooho tsahá ndo ticanuu tsi

nyíví ndaaahvi. ¿A ña tsitó ndo tyin juvin nyíví cuca tsahñí ndaaahvi tsi ndo, tan tsindacá ñi tsi ndo nuu ra cumí tyiñu? ⁷ Tan ¿a ña tsitó ndo tyin nyíví can caahán ñi ndavaha ñi siví ii ra Cristo, ra yihí ndaha tsi ndo?

⁸ Ley Nyoo tsa ñiñi ca catyí tsi: “Cuñí ndo tsi nyíví tumaa tsa cuñí ndo tsi maa ndo.” Tatum javahá ndo tsa catyí ley can, vaha javahá ndo. ⁹ Maa tyin tun intuhun ñi nyíví cuñí ndo, tan ña cuñí ndo tsi inga ñi, tsicoó cuatyí ndo tyin catyí ley Nyoo tyin iyó cuatyí nyíví javahá tacan. ¹⁰ Tyin tatum iin nyíví tsa tyaá yahvi tandihí ley, tan ña tyaq yahvi ñi intuhun tsi, cuví tsi tumaa tsa ña tyaá yahvi ñi tandihí ley. ¹¹ Tyin Nyoo catyí ra tyin ña coo inga ñaha tsi rayíi, tun iyó ñasihíi ra. Tacan tucu ñiñaha, tsa iyó yíi, ña cuví coo inga rayíi tsi ñi. Tan juvin ñi catyí tucu ra tyin ña cahñí yo nyíví. Yacan cuenda tatum iin ra nduve inga ñaha tsi ra, maa tyin tsahñí ra iin nyíví, juvin ñi ña tyaá yahvi ra tsa catyí ley. ¹² Maa tyin ley ra Cristo tsa jacacú tsi yo cua catyi tun vaha o ña vaha javahá yo. Yacan cuenda nducu ndo cuhva cahan ndo tan cuhva coo ndo. ¹³ Tyin nyíví tsa ña cundaahví iñi tsi tahan ñi, Nyoo cua tatsi tuñi ra tsi ñi, tan ña cua cundaahví iñi ra tsi ñi. Maa tyin ñi tsa cundaahví iñi tsi inga ñi, cua quita vaha ñi quíví cutuñi ñi.

¿Ndáa tsa jacacú tsi yo, tsa tsinú iñi yo tsi ra Cristo o tsajawahá yo tsa vaha?

¹⁴ Yañi, nduve nacatyí tsinú iñi ndo tsi Nyoo, tun ña javaha ndo tsa vaha. ¿A jacacu tsa tsinu iñi yo tsi Nyoo ñi tsi yo? ¹⁵ Na jaha yo tuhun: Iin tsaha iin ra yañi yo nduve jahma ra tan nduve tsa catsi

ra tan tsahən ra yuvehe un, ¹⁶ Maa tyin yooho ña tsahə un jahma ra tan ndi tsa catsi ra tan catyí un tsihin ra: “Cúaahan tan Nyoo cuhun tsihin un. Na coo ca jahma un tan tsa catsi un”, catyí un. Nduve nacatyi cahən un tacan tyin ña tsahə un tsa tsíñi ñuhu tsi ra. ¹⁷ Tan tacan ñi cuñi tucu yo tsihin tsa tsinú iñi yo, tun catyí yo tyin tsinú iñi yo tsi Nyoo tan ña jatyinyee yo tsi nyívi, nduve yahvi nyaá catyí yo tyin tsinú iñi yo.

¹⁸ Yihí ndo cua catyi ndo: “Yooho tsinú iñi un tsi Nyoo tan yuhu javahá yu tsa vaha. Tan catyí un tyin tsihin tsa tsinú iñi ñi yo tan cuví cacu yo.” Maa tyin yuhu catyi yu tyin juvin ñi cahnu cuví tucu tsa javahá yo tsa vaha. Tyin yooho ña cuví janaha un tsa tsinú iñi un tsi Nyoo tsi yu tun ña javaha un tsa vaha. Maa tyin yuhu cuví janahá yu tsa tsinú iñi yu tsi Nyoo tsi un tsihin tsa javahá yu tsa vaha. ¹⁹ Nditsa tsa tsinú xaan iñi un tyin iyó intuhun ñi maa Nyoo. Vaha tyin tsinú iñi un. Maa tyin nu ñavaha nahnu tsinú tucu iñi nahnu tyin iyó intuhun ñi Nyoo. Tan yacan cuenda nihí nahnu tsihin tsa yuuhví nahnu tyin ña cua cacu nahnu. ²⁰ Ña soho xaan caca iñi un. Cütuñi iñi tyin tun tsinú iñi yo tan ña javahá yo tsa vaha, nduve yahvi nyaá tsa tsinú iñi yo. ²¹ Ra Abraham, tsii tsaahnu yo, cuví ra iin ra vaha nuu Nyoo tyin jamañi ra tsi ra Isaac, sehe ra, tumaa catyi maa Nyoo tsihin ra. ²² Ihya nyehé yo tyin tsa cuenda tsa tsinú iñi ra Abraham tsi Nyoo javahə ra tsa catyi ra tsihin ra tyin javaha ra. Tan tsa javahə ra yacan, quituví vaha tsa tsinú iñi ra tsi Nyoo. ²³ Tacan tan cundaq tsa catyí nu tutu Nyoo tyehen: “Ra

Abraham tsinú iñi ra tsi Nyoo, yacan cuenda cuví ra ra vaha nuu Nyoo.” Tan iyó tucu inga nu catyí tsi: “Ra Abraham, cuví ra ra vaha iñi tsi Nyoo.”

²⁴ Tan ihya cuví nu cutuñí iñi yo tyin vaha yo nuu Nyoo tatum tsinú iñi yo tsi ra tan javahá yo tsa vaha tan ñavin tsihin tsa tsinú iñi ñi yo tsi ra. ²⁵ Tan tacan tucu ña Rahab tsa tsicá nuu tsihin rayíi. Yahá tsa javahá ña cuatyí, javahá ña tsa vaha quíví tsaha ña nu tsiyucu xeehe ra tsa jacuhun ra Josué. Tan jatyinyee ña tsi ra naha tsa cuhun ra naha inga ityi. Tan tsa cuenda yacan, catyí Nyoo tyin vaha ña. ²⁶ Tan tacan tucu cuví cuñu ñuhu nyívi. Tatum nduve ca tsa nyitó ñi iyó tsitsi cuñu ñuhu can, nduve ca yahvi nyaá can. Tan tacan cuví tucu yoó, tatum ña javahá yo tsa vaha, nduve yahvi nyaá tsa tsinú iñi yo.

3

Nacaa jaha cuenda yo cuhva caahán yo

¹ Nyooho yañi, ña yatyí xaan cuñi ndo cuvi ndo ra cahan tuhun Nyoo. Tyin tsító ndo tyin nyuhu tsa caahán ndi tuhun Nyoo, tatum ña vaha cahan ndi, ñihí ca cua tatsi tuñi Nyoo tsi ndi tan ñavin ca nyívi tsa ña caahán tuhun Nyoo. ² Tyin tandíhi maa yo tan tsicoó cuatyí yo, maa tyin ra tsa ña javahá cuatyí tsihin tsa caahán ra, juvin ra cuví ra vaha tyin cuví ndaca ñaha ra naníi cahnu cuñu ñuhu ra. ³ Tumaa ra tsa tyihí yoho yuhu cuayu cuví ndaca ñaha ra tsi ti, vasu ndi maa cahnu ti. ⁴ Tan tacan tucu iin yutun ndoo tsa tsicá nu ndutya ñuhu, vasu cahnu tsi maa tyin tsihin vitu luhlu tsa nyaá ityi xuu tsi, cuví jacuhun ra jacacá itsi

ndáa ityi cuñí maa ra, vasu ñihí xaan yihí tatyí.
⁵ Tan tacan tucu yaa yo, luhlu xaan tsí. Maa tyin cuaha tsa caquiñí cuvi cahan yo tsihin tsí. Tumaa nu natíiñ iin ñuhú luhlu iin cuhu cahnu tan cayu tandíhi maa yutun. ⁶ Tacan tucu yaa yo cuví tsí tumaa iin ñuhú luhlu. Tan cuví tucu tsí tumaa iin tsa quiñí cahnu tsa jatíví tsí naníi cahnu cuñú ñuhu yo tan tandíhi cuhva iyó yo ñayíví ihya, tyin juvin ñí maa nu ña vaha natyuhú itsí. ⁷ Nyíví cuví jandumasu ñí tandíhi maa nuu quíti tsa iyó: saa, coo, tan quíti tsa iyó tsitsi ndutya ñuhu. ⁸ Maa tyin yoñí cuví jandumasu yaa yo tyin cuví tsí iin tsa ña vaha tan ña tsahá tsí cundaca ñaha yo itsí. Tumaa iin coo tyihí tí venenu tí tsí nyíví, tan tsihí ñí. Tacan cuví yaa yo. ⁹ Tyin juvin ñí tsihin yaa yo jacahnú yo tsi Nyoo Jutu yo. Tan juvin ñí tsihin can caahán tucu yo ndavaha ñí siquí nyíví tsa javahá Nyoo tumaa caá maa ra. ¹⁰ Juvin ñí tsihin yuhu yo jacahnú yo tsi Nyoo. Tan juvin ñí tsihin can caahán yo tsa caquiñí. Maa tyin yañi, ña taahán tsí tsa javahá ndo tacan. ¹¹ Tyin, ¿a cuví quita ndutya cuii tan ndutya uva tsitsi iin ñí ndohyo? Ña cuví. ¹² Yañi, ¿a cuví cuhva tumangu iin paya, o cuví cuhva tupaya iin mangu? Ña cuví. Tan tacan ña cuví quita ndutya uhva tan ndutya cuii tsitsi iin ndohyo.

Tsa tsíñi tuñi tsa vaha ca

¹³ Tatun yihí ndo tsító ndo tan iyó tsa tsíñi tuñi tsi ndo, janaha ndo can tsihin tsa catsi iyó ndo. Tan ña nduyaa ndo javahá ndo tsa vaha tyin javahá ndo can tsihin tsa tsíñi tuñi Nyoo tsa iyó tsi ndo. ¹⁴ Maa tyin tatun nyiyo iñi ndo tsitsi añima ndo tan cuñí

xaan ndo nduvaha ndo nu nyiví, ña cahnu jahá ndo tsi ndo tan catyi ndo tyin iyó tsa tsíni tuñi tsi ndo. Tyin tun cahnu jahá ndo tsi ndo, tyihí xeehe ndo tsa nditsa, cuví can. ¹⁵ Tyin tun tacan tsicá iñi ndo, ñavin tsa tsíni tuñi Nyoo cuví can, tyin cuhva tsicá iñi nyiví ña tsitó tsi Nyoo tan cuhva tsica iñi nu ña vaha cuví can. ¹⁶ Tyin tatum nyiyó iñi ndo tan cuñí ndo nduvaha ndo nuu nyiví, ticaña xaan tsicá iñi ndo. Tan iyó tucu tandihí inga nuu tsa ña vaha nu yucú ndo. ¹⁷ Maa tyin tatum iyó tsa tsíni tuñi Nyoo tsi ndo, cuítí iyó ndo, catsi iyó ndo. Tan nducú ndo cuhva coo vaha ndo tsihin nyiví tsihin tsa vita iñi ndo, tan vaha nyiví cuví ndo. Tan catsi vaha tsicá iñi ndo, tan cundaahví iñi ndo tsi nyiví, tan caahán ndo tsa nditsa tsihin ñi, tan nducú ndo tsa vaha tsi ñi tsihin tsa nii iñi ndo. ¹⁸ Tatum iyó vaha yo tsihin nyiví, tan iyó taxin yo tsihin ñi, cua coo yo ñayiví cuítí.

4

Ña taahán tsi javaha yo cuhva cuñí cuñu ñuhu yo

¹ ¿Nacuenda iyó tisihí nu yucú ndo? ¿Nacuenda iyó cuatyí? Tsa cuenda tyin tsitsi añima ndo tsicá iñi ndo maa ñi maa tsa ña vaha. ² Iyó tsaha nda cuanda tsahñí ndo nyiví tyin cuñí ndo tsa cuñí ndo tan ña ñihí ndo can. Tatum nyehé ndo náa cuví can nyehé ndo, nyiyó iñi ndo can tan tsa ña ñihí ndo can quitsaha cañi tahan ndo. Ña ñihí ndo tsa cuñí ndo tyin ña tsicán ndo can tsi Nyoo. ³ Tatum tsicán ndo tsa tsicán ndo tsi ra tan ña ñihí ndo can, ña tsahá ra can tsi ndo tyin tsitó ra tyin cua jatíví ndo can tsihin tsa taahán iñi ndo. ⁴ ¿Nacuenda javahá

ndo cuhva cuñí nyiví, nyooho tsa ña tsinú vaha iñi tsi Nyoo? ¿A ña tsitó ndo tyin tun jahá yo cuhva cuñí nyiví, ñi xaan iñi tsi Nyoo cuví yo? ⁵ Tan yacan iyó cuenda catyí nu tutu Nyoo tyin Tatyi Ii tsa tsahá ra coo añima yo, cuñí xaan tsi tsi yo tan cuiñu xaan tsi tsi yo tyin cuñí tsi tsa jahahnu yo tsi intuhun ñi maa ra. ⁶ Tan jatyinyéé xaan Nyoo tsi yo tsa nacuhvá yo tsi yo tsi ra. Tyin catyí ra tyin jatyinyéé ca ra tsi nyiví ndaahvi tsa tsitó tyin tsiñí ñuhu ra tsi ñi. Tan ña cuñí ra nyehe ra tsi ra tsa cahnu jahá tsi. ⁷ Yacan nacuhva vaha ndo tsi ndo tsi Nyoo. Ña tyaa yahvi ndo nu caahán nu ña vaha tyin tun ña jahá ndo cuenda nu caahán nu, tacan tan cua cunu nu nyehe nu tsi ndo. ⁸ Ndýcu ndo cuhva cunyanaa vaha ca ndo tsi Nyoo tyin tacan tan natuhva ra tsi ndo. Nyooho, nyiví iyó cuatyí, jandundíi ndo tsi ndo. Tan nyooho tsa tsicá iñi tyin cuví javaha ndo tsa iyó nu ñuhu ñayiví ihya tan juvin ñi cuhva can tan jahahnu tucu ndo tsi Nyoo, jandu iin ndo iñi ndo tan cuhva ndo añima ndo jacutu Nyoo tsa vaha, tyin tacan tan ndundíi ndo nuu ra. ⁹ Cuiihya cuñí ndo. Vacu ndo. Na nacoto ndo tyin ña vaha cuhva iyó ndo. Tsa nuu tsa vacu naaha ndo tsihin tsa sii cuñí ndo, vacu ndo tsihin tsa cuiihya cuñí ndo. Tan tsa sii cuñí ndo na nanduvi tsi tucuiihya iñi. ¹⁰ Ndaahvi jaha ndo tsi ndo nuu Jutu Mañi yo, tyin tacan tan janducahnu ra tsi ndo.

Ña cahan nyaa ndo tsi nyiví

¹¹ Yañi, ña cahan ndo ndavaha ñi siqui iin yañi yo. Tyin nyiví caahán ndavaha ñi siqui nyiví, o caahán nyaa ñi nyiví, siqui ley Nyoo caahán ñi

ndavaha ñi tan caahán nyaa ñi cuví can. Tyin tun caahán nyaa yo ley Nyoo, juez jahá yo tsi yo tsa nuu tsa tyaá yahví yo tsa caahán ley can. ¹² Tyin intuhun ñi ra tsahá ley can. Tan juvin ñi ra cuví Juez. Tan juvin ra cuví ra jacacú tsi yo, o jacunaá tsi yo. Tan ¿yooho yóo ra cuví un tyin cahan nyaa un tsi inga nyívi, tan tatsi tuñi un tsi ñi tan jaha un tsi un tumaa juez?

Ña tsító yo náa cua cuvi tsi yo tyaan, yacan cuenda ña taahán tsi cahnu jaha yo tsi yo

¹³ Yihí ndo catyí ndo: “Vityin o tyaan cuhun yo ñuu can, o inga ñuu can. Tan ndoo yo ican iin cuiya tan jaha tyiñu yo tan jaha canaa yo xuhun”, catyí ndo. Maa tyin tyáa soho ndo tsa cua cahan yu ihya: ¹⁴ Ñayívi tsa iyó yo cuví tsi tumaa vico nuhu tsa tuhvá yihí tan iin yaha ñi naa ihñi nyico. Ndi ña tsító ndo tsa cua cuvi tyaan tan catyí ndo tyin cuhun ndo. ¹⁵ Vaha ca cahan ndo tyehen: “Coo yo juhva ca quívi tan javaha yo tsehe o yacan, tun Jutu Mañi yo tan cuñí ra.” ¹⁶ Maa tyin nyoooho ña caahán ndo tacan, tan cahnu xaan jahá ndo tsi ndo. Tan Nyoo ña taahán iñi ra nyehe ra tsi nyívi javahá tacan. ¹⁷ Tyin yoo tsa tsító javaha tsa vaha tan ña javahá yo can, tsicoó cuatyí yo.

5

Nu tsahá cuenda ra Santiago náa cua tahan nyívi cuca

¹ ¡Tyáa soho ndo tuhun caahán yu ihya, nyoooho nyívi cuca! Väcu ndo tsihin tsa cuiihya cuñí ndo, çana tsaa ndo tsa cuenda tundoho tsa cua nyehe ndo. ² Tyin tsa cuca tsa jacayá ndo, tsa ndíhi can

tyaahyú. Tan jahma vaha ndo, tsa ndihí maa can tsatsí tiquixin. ³ Xuhun cuaan tan xuhun cuitsin ndo tsá ndihí can cuxí. Tan cuxi can tsahá cuenda can tyin ña vaha javahá ndo tsihin xuhun ndo. Tan juvin can cuvi tumaa ñuhú tsa cua cahmi tsi ndo. ¿Nacuenda jacayá ndo tsa cuca nu cua ndihí quíví ihyá? ⁴ Tan ña tyahví ndo yahvi tsa taahán tsi tsi nyíví ndaahvi tsa jahá tyiñu tyiñu ndo. Tan vityin tsicán ñi cuatyi tsaha ndo nuu Jutu Mañi yo, ra ndacá ñaha tandihí ángel tsa cuví andaru cuenda ra. Tan maa Jutu Mañi yo tsiñí ra tuhun caahán ñi ndaahvi can. ⁵ Iyó vaha xaan ndo nu ñuhu ñayíví ihyá tyin cuva ndo. Tan javahá ndo cuhva cuñí maa ndo. Tumaa tuhvá nyíví janduxaahán quini tyin cuu tí, tacan javahá ndo tsihin ndo. Tan vityin tsa tsaa quíví tsa cua cuu ndo. ⁶ Tyin tyaq ndo cuatyi tsaha nyíví vaha tan tsahñí ndo tsi ñi. Tan ndi ña cahañ ñi cuatyi siquí ndo.

Na cunyee iñi yo cuatu yo tsi ra Cristo

⁷ Yacan cuenda, yañi, janyee ndo iñi ndo cuatu ndo nda cuanda quitsi nyico Jutu Mañi yo. Tumaa ra tsa jahá tyiñu tsitsi cuhu ndatú ra nda cuun savi tsa jihna tan nda ndihí cuun nyico tsi, tan naquihin ra tsa tatsí ra. ⁸ Tan tacan taahán tsi cunyee iñi yo cuatu yo tsi Jutu Mañi yo. Jandu iin ndo iñi ndo tyin tsa yatyin cuii quitsi ra.

⁹ Yañi, ña tyaq ndo cuatyi tsi yañi ndo, coto tatsi tuñi Nyoo, ra cuví Juez, tsi ndo, tyin tsa nyaá ra tsa cuñí quitsi ra. ¹⁰ Yañi, quihin cuenda ndo cuhva tsicoq ra cuví ndusu yuhu Nyoo tahañ tsanaha. Tyin ra ican naha ra cunyee xaan iñi ra na ha nyehé ra na ha tundoho quíví tsahá cuenda

ra na ha tuhun Jutu Mañi yo. ¹¹ Tsitó yo tyin sii xaan cuñí ra tsa cunyeé iñi nyehé tandihí nuu tundoho, tumaa tsa cunyeé xaan iñi ra Job nyehé ra tundoho. Tan nu ndihí ña, cuaha xaan tsa vaha tsahá Jutu Mañi yo tsi ra, tyin Jutu Mañi yo iyó xaan tucahnu iñi tsi ra. Tan cundaahví iñi ra nyehé ra tsi yo. ¹² Maa tyin yañi, ña cahan ndo: “Naha Nyoo maa”. Tan ña cahan ndo: “Tsitó vaha maa ra nyaá gloria”, tan ndi ña cahan ndo: “Tsitó vaha maa ra javahá ñuhu ñayiví”, tan ndi ña cahan ndo inga ca tuhun tahan can. Tatun nditsa tuhun caahán ndo, “nditsa” cätyi ndo. Maa tyin tatum tsitó ndo tyin ña nditsa, cätyi ndo tyin “ñá nditsa”, coto tatsi tuñi Nyoo tsi ndo.

¹³ Tun ndáa nyooho nyehé tundoho, ndacan tahvi ndo tsi Nyoo. Tan nyooho tsa sii cuñí, cäta ndo yaa Nyoo. ¹⁴ Tan nyooho tsa cuuhví, cäna ndo tsi ra tsahnu vehe ñuhu na ha ra tyin ndacan tahvi ra na ha tsa cuenda ndo tan tyihi ra na ha acetye tsi ndo tsihin sivi ra Cristo. ¹⁵ Tan tatum tsinú iñi ra na ha tsi Nyoo cuuhva tsa tsicán tahvi ra na ha, nyiví cuuhví can cua nduvaha ñi. Tan Jutu Mañi yo cua janduvita ra tsi ñi. Tan tatum tsicoq ñi cuatyi, Nyoo cua jaha ra tucahnu iñi tsi ñi. ¹⁶ Yacan cuenda nahma ndo cuatyi ndo tsi iin ndo tan tsi inga ndo. Tan ndacan tahvi ndo tsi Nyoo tsa cuenda inga ca nyiví na nduvaha ñi. Tyin nu tsicán tahvi iin ra vaha tsicá tsihin Nyoo, iyó xaan tunyee iñi Nyoo. ¹⁷ Tumaa ra Elías ra cuví ndusu yuhu Nyoo tahañ tsanaha. Cuví ra iin rayii tumaa maa yo. Tan tsicán tahvi ra tsi Nyoo tyin na ña cuun savi. Tan ña cuun savi uñi cuiya sasava. ¹⁸ Yahá can tan tsicán tahvi nyico ra tsi Nyoo inga tsaha

tyin na cuun savi. Tan cuñn tsi inga tsaha. Tan tsahnñ tsit*i* tsa tats*j* nyiv*i*.

¹⁹ Yañi, tatum iin nyiv*i* tahan ndo nacoq ñi tuhun nditsa Jutu Mañi yo, tan cuanuhñ ñi ñayiv*i* inga tsaha, tan jatyinyeé ndo tsi ñi tsa nanducu nyico ñi ityi Nyoo, ²⁰ coto ndo tyin tsa javahñ ndo tacan tsihin ñi, jacacñ ndo añima ñi tan ña cua cuhun ñi anyaya. Tan jahá Nyoo tucahnu iñi cuatyi ñi jahá ndo.

Tuhun tsaa tsa nacoo jutu mañi yo Jesucristo tsi yo

**New Testament in Mixtec, San Juan Colorado
(MX:mjc:Mixtec, San Juan Colorado)**

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, San Juan Colorado

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

c270ec54-172a-541f-83e6-7760f619c744